

四庫全書

集部

欽定四庫全書

傅與礪詩集卷六

元 傅若金 撰

七言律詩

元日朝賀後聞赦

紫殿風雲會措紳榮光又逐歲華新  
近時鐵馬清南海昨夜金雞動北辰  
法令已行秦郡縣禮儀仍見漢君臣  
獨勞聖主哀黔首還以殊恩服遠人

春蒐和賀伯更

竹殿千旗拂紫宮  
臂鷹年少喜遭逢  
子雲賦好誰能薦  
司馬才高不得從  
天外帛書無過鴈  
苑邊雲氣盡成龍  
金輿早晚還雙闕  
玉體尋常鎮九重

鷹隼晨飛馬正驕  
駕鵝春過雪初消  
鳴鞘捷應金鞵脫  
薦鼎肥勝玉筍挑  
朱袖拂雲歸苑近  
翠華吹雨度山遙  
即今誰入熊羆兆  
空使愁心似柳條

送臨川黃次舉南嶽巡檢

客遊帝城今幾春  
忽聞歸思滿江濱  
誰憐日月淹文舉

自愛雲山入徼巡  
瀟湘樹合瞻南岳  
臨汝花開憶北人  
若過長沙訪耆舊  
更因回鴈寄書頻

送趙宗吉御史兼寄篤敬夫

只今臺閣用文儒  
幾處瘡痍待掃除  
念我北遊同社燕  
看君南去食鯖魚  
雲霄舊載郎官筆  
江海新乘御史車  
若值故人憑寄語  
金陵詩思近何如

和危山臞寄弟四首

天子開朝策治安  
近臣每入漏初殘  
香飄紫殿迴金爵

仗下彤庭度玉鸞御苑縱田春正樂邊城吹角夜猶酸  
腐儒未省經邦計直道休歌行路難

畫戟連雲甲第高內官如雨送春醪貢金半鑄分封印  
賜錦多裁侍宴袍自古聖明非獨治至今材武係相遭  
文章且共安徵命廊廟由今錄舊勞

故園兄弟總相思久客懷歸屢失期司馬却慚題柱早  
東方翻恨上書遲都門樹暗愁中見鄉國花繁別後知  
昨日南橋訪春水望雲回首獨多時

天涯骨肉久離居京國風塵鬢欲疎  
娛日強傾開歲酒憶家頻看隔年書  
路通一水花開裏門掩千峰木秀初  
便擬邀君此時發歸舟同食楚江魚

送梁實翁免催鐵歸鄉

幾年催鐵困吾州鄉井供輸日夜愁  
廢冶月明誰鼓鑄空村民散更誅求  
豈聞兔腎成千莫虛擬龍光在斗牛  
此日罷征君倍喜楚江春色滿歸舟

壽王左丞

南極諸星映赤霄東風二月滿青條  
焚香鳳閣春開宴鳴玉龍墀午散朝  
但使經綸齊稷契不勞服食慕松喬  
日長自度昇平曲閒聽雲間合九韶

野航亭

孤亭聞道小如舟來客閒能學棹謳  
常疑竹裏通歸棹只擬花間弄釣鉤  
月明入剡寧論夜風起思吳不待秋  
城市誰知有江海烟波祇在屋東頭

送盧茂實之廣東憲幙二首

僊城近接衆山迴，憲府遙臨百粵開。  
海上喜通持節使，幙中兼得濟時材。  
鮫宮織罷魚龍出，蜃戶珠還蚌蛤來。  
預想到官多暇日，清詩題遍嶺頭梅。

京國相逢念客遊，微官初試嶺南州。  
越裳白雉親曾識，勾漏丹砂豈願求。  
荒徑久違元亮宅，故山猶隔仲宣樓。  
瓜期況在經年後，未得相從狎海鷗。

### 城東遇雨

四月鑾輿出鳳城，此時游子動歸程。  
蓬萊一水通雲氣，



闔闔千門度雨聲  
書卷喜從船尾載  
酒盃愁就馬頭傾  
長年三老歡相語  
沙際河流一夜生

送張尚德改除雩都革頭巡檢

儒官乘障氣飄飄  
童貢南邊路不遙  
縱使人烟連百粵  
也勝風俗混三苗  
春行近市盃隨手  
夜邏前山箭在腰  
直以詩書化彊禦  
不勞銅柱入雲標

寄王君實張孟功趙子期三首

子期名期至順進士篆書冠世

左司衡鑑冠時流  
憶昨相逢早見收  
介子初還漢使節

鄂君又汎越人舟詩因海燕猶須寄書換池鷺或可求  
不有文章誇異俗天涯何以慰羈愁

吏部先為畫省郎獨憐驅馬向殊方越裳萬里來中國  
楚客三年憶故鄉度嶺敢辭南海熱溯江終憶北風長  
清詩誦罷頻迴首愁絕都門柳萬行

兵部風標映海霞只今人物數才華六書盡學周王鼓  
重譯親通漢使槎每喜名公能薦士最憐遊子獨思家  
詩成定覓何人寄日日江頭訪鴈沙

寄李仲倫孫伯剛兼呈張吏部

微官萬里向南溟却望京華樹色青  
最憶故人能作賦只憐多士廢明經  
孫陽遂使知名馬李白虛傳是列星  
東道喜逢賢吏部豈無餘力致青冥

寄王叔善蕪呈子山內相二首

為客長歌行路難得君真使旅愁寬  
也知文氣來西漢敢以詩名敵建安  
秋榻每當明月下春山閒就亂雲看  
只今清興誰能共縱有朱絃不肯彈

學士高操令罕儔主人與客俱風流花連紫閣天文動  
樹隔青宮月影稠長楊獻賦仍須薦曲几行書不待求  
楚客南歸苦相憶繫船時復憶江樓

寄陳維禎兼呈揭公公許為故妻作傳二首

官樹青青隔帝閭維舟北望每消魂風來獨使占雲氣  
雨罷頻勞測水痕下榻往時同假館吟詩清夜憶過門  
君家太史令司馬著述時應教外孫

太史臨文筆最精一聞往事獨傷情每憐對鏡窺鸞舞

猶怪吹簫逐鳳鳴列女未終劉向傳故妻虛瘞柳州銘  
書成定寄湘江浦預擬招魂學楚聲

潮州示同舟

來時岐路滿沙邊回首何堪問歲年槎上獨乘猶是客  
坐中同載或疑仙風鷗亂起還依草雨燕卑飛却避船  
舊見垂楊已如此往來能使幾人憐

眉山圖

眉山自古聞天下此日逢君出畫圖空翠忽浮雲氣合

江流還浸月輪孤獨疑參井通秦塞始信岷峨限蜀都  
見說直西多鳥道懶從開國問魚鳧

送王檢校止善二首

前海道  
經歷

海上三年幕府開日邊萬里薦書來却承雨露歸南省  
還接星辰繞上台負弩應憐縣令至懷章莫使郡人猜  
京華昨日同時發慚愧扁舟獨後廻

江左名藩天下雄吳中貢賦與閩通轉輸舊倚蕭丞相  
檢校新煩魏侍中畫省芙蓉深映雨碧湖楊柳近含風

於今幕府多名勝閒暇登臨定得同

贈黃仕任地理

蚤歲為儒頗恨疎中年游藝獨何如謝公自製登山屐  
郭氏親留相地書丹壑夜營仙客苑青溪晨訪野人居  
他時期子千峯下為卜雲林更結廬

題阮謙仲客子光陰集遊吳小稿後二首

江上經年別故林天涯何物寫鄉心長亭莽蒼含朝莫  
岐路崢嶸對古今行世共憐車轍滿憂時恒恐鬢毛侵

嗣宗文采諸孫在亦有幽懷托苦吟

江左傳君處處過六朝文物近如何  
齊梁祖述風流盡  
吳越登臨感慨多  
雨暗海門秋對酒  
天晴江浦夜聞歌  
此行曠喜添詩興  
莫向流年歎逝波

題山谷蕭峽詩後

為阮謙仲所得

太史遺風不可尋  
祇饒遺墨重千金  
雲烟慘淡連蕭峽  
風雨蒼茫入阮林  
持翫每淹孤客坐  
買藏終見兩賢心  
向來豪奪今何在  
撫卷長歌百感深



題羅士哲畫送張仲簡謁虞杜二先生

滿幅晴烟寫別離  
行人江浦放歌時  
樹深一水通臨汝  
花發千峰到武夷  
問字只攜門外酒  
尋仙豈看洞中棋  
扁舟却出名山路  
應得藏書慰所思

方壺

蓬萊員嶠對嵯峨  
知有羣仙日日過  
琪樹曉通雲氣近  
羽輪秋會月明多  
秦人采藥空依海  
漢使乘槎但入河  
誰識高齋有仙島  
不勞萬里涉風波

園春亭

暖風遲日布雲林中有華亭結構深  
窓戶每兼山翠合  
衣巾無復市塵侵  
居人隔塢求花氣  
遊客巡牆得樹陰  
始信桃園渾不遠  
欲從漁父一相尋

送胡一清北遊

早聞閉戶讀春秋  
近說辭家賦遠遊  
懷玉空迷父母國  
貢金終入帝王州  
中天城闕連閭闔  
東壁圖書近冕旒  
自是聖明思至理  
可無俊彥應旁求

清意齋為一清題

高齋聞道無塵俗  
好客惟應數往來  
幽共白雲秋縹緲  
迥同玄鶴夜徘徊  
水邊坐石時依竹  
雪後尋溪獨見梅  
况有文章每相發  
也知韋柳最多才

答何好禮

鳳凰城中花若烟  
客遊多是感流年  
春生江漢思南國  
雪盡幽并見北邊  
遠使豈貪歸有索  
微官仍苦坐無羶  
相逢未恨今晨別  
滿把驪珠慰目前

贈相地姚立雪

聞君早得青囊秘，藜杖登臨日幾峯。  
花底或尋仙洞出，樹間時與異人逢。  
只疑東海聞歸鶴，莫怪南陽有臥龍。  
吾郡古稱山水國，白雲常伴往來蹤。

送何時春北上

何郎早賦遠遊篇，忼慷題詩向別筵。  
自古衣冠多愛士，只今臺閣况求賢。  
秦吳道路元通楚，趙魏人才總入燕。  
好向明時致勲業，莫將風雨負華年。

送何時學遊湖南北

潯陽極浦遠帆多憶昨狂遊是處過今日送君如夢寐  
少年為客莫蹉跎沅湘日落明秋葉江漢風迴亂夕波  
若過楚纍憑借問沙頭芳草近如何

送朱道夫潯州伏化巡檢三首

鬱林文學負才華刀筆三年滯海涯乘障復趨丹徼遠  
問途應傍碧虛斜山中綠酒開浮螳石上雕弓照畫蛇  
南望桂枝相憶苦使來先許寄長沙

伏化官居倚竹棚此邦幽絕少炎蒸洞穿白石通勾漏  
江汎清潏轉猛陵揮翰有時風在竹罷琴中夜月侵藤  
遙知盜賊令全息獨使才情得見稱

去年京國欲離羣前日瀟湘喜見君邊吏只令多用武  
世儒何事獨能文湘南作客迷春草嶺表思親隔暮雲  
莫怪書生佩弓矢起家猶憶漢將軍

西江石梁二首

西江斷橋不可渡好事架石橫清泠遂疑雲海通三島

無復天河限兩星  
夜涉不愁風滿瀨  
曉行還愛月浮汀  
遙知溪客多幽興  
炎夏頻來倚畫亭

西江波浪日沄沄  
驅石成橋事出羣  
常憐烏鵲空依月  
只怪蛟龍未得雲  
中流屋影晴先見  
別浦灘聲夜轉聞  
知有駟車當過此  
蜀中司馬最能文

送蒙稅使

江東人為  
新金務使

聞君監稅獨多年  
行旅皆稱使者賢  
江嶺近通南海貨  
市門深聚北風船  
金陵曉雨歸帆外  
玉筍晴雲祖帳前

若到京華論國計莫令官府重緡錢

劉漢中張天彛邀飲

二子才情自不羣座中賓客總能文  
酒壺爛漫傾春露歌扇留連駐暮雲  
湘樹別時春冉冉江蘿歸處綠紛紛  
閒門此日偏相憶風雨蕭條不共聞

同孔學敏遊仙遊觀二首

鳳音亭下草如熏誰見仙妹倚翠裙  
環珮忽疑遊處得笙簫猶想去時聞  
湘江竹暗連春雨衡岳花開隔暮雲



千古遊人自來往登高回首思紛紛

恒仙宅前江水盈鳳凰山下野禽鳴猶聞採藥辭空谷  
無復焚香禮上清雲裏並遊金節冷月中同載羽輪輕  
登臨盡日多惆悵欲倚鸞簫和楚聲

題裴思敬別業

宦遊江國久為家况有田園楚水涯直為思親勞夢寐  
不堪行役向風沙故池引徑元依竹春院開門總映花  
盡道此中多野趣肯因微祿負年華

送嚴允恭北上

嚴氏風流著汗青  
看君年少復明經  
上書自擬干天子  
垂釣誰能問客星  
燕薊北回天漠漠  
瀟湘南下雨冥冥  
遠遊直為明時出  
自古賢良重漢廷

送薛仲方歸涿省墓

淮海飄零憶范陽  
南來蹤跡轉蒼蒼  
幽燕日落悲長道  
江漢春深夢故鄉  
家在惟供一洒泪  
書來祇使百回腸  
明年何處求先塚  
北望松楸滿路傍

漢江街山圖

西來一水浮襄漢上有羣峯截杳冥層構迴臨沙渚白  
亂帆斜蔭石林青地雄縹緲連蟠冢天險微茫帶洞庭  
咫尺風烟應萬里無因一上峴山亭

寄許參政

相第巍巍畫省東布衣時許往來通忽聞冠蓋辭三殿  
猶有文章在兩宮故園撫樹思陶令別墅看花憶謝公  
楚客南遊最相憶扁舟前月到湘中

題壽寧觀

壽寧林壑抱清虛上有羣仙舊隱居  
花裏畫愁雲失洞竹根晴愛水鳴渠  
山人自著茅君傳弟子親持柱史書  
遊客暫來還徑去未能真與世情疏

題畫船入蜀圖送黃尚質赴夔州蒙古教授

楚客之官泛蜀船畫圖盈尺見山川  
九江樹色瀟湘外三峽猿聲灩澦前  
方譯漸通巴俗語國書新紀漢人傳  
豈無好事能攜酒問字時時集講筵

送平樂尹宋彥禮

湖南大府收羣彥嶺表名區得令才  
邊吏賦田疲戰伐  
古人為邑慎懷徠  
昭潭樹傍鳴禽合  
仙嶺花臨倚棹開  
此去風烟隔湘浦  
知君時憶楚王臺

送蔣廷良歸省因簡袁潮陽

送客湘江見白蘋  
登高懷遠况思親  
斗牛紫氣臨三楚  
吳越青山到七閩  
南下恰逢香稻熟  
東遊仍憶荔枝新  
扁舟定過袁宏渚  
煩寄殷勤問故人

送趙璋甫

名家之駒不易得昔人傳業子如何花飛南岳客遊遠  
水落西江鄉思多太息長憐漢傅榮獨醒誰和楚纍歌  
歸舟豈愛鱸魚美應恐秋山損薜蘿

寄盧經歷

去年闕下遇君時御柳千條拂馬垂楚客南來空有賦  
漢臣北望每能詩月生庾嶺思梅樹霜薄交州見荔枝  
溟海迢迢苦相憶培風猶倚故人知

送姚子微二首

雙闕除書下玉階三湘回棹拂珠厓天垂銅柱南低海  
地入金陵北近淮江國鴈來秋肅肅驛樓雞動曉咭咭  
大家定有東征賦鮭菜隨船慰老懷

野人憶別寸心傾臺憲頻聞被寵榮湖外樹圍烏府立  
嶺頭花夾繡衣行平原未得收毛遂北海親勞薦禰衡  
慚愧駑駘後騏驎西風回首獨長鳴

宜江歲晏東余太守樊別駕

梁楚烟塵日未寧故園迢遞感流萍北風歲暮聞烏鵲  
南浦天寒見鵲鴒游子未歸心轉切故人相愛眼終青  
羈栖自喜依仙館不爲籠鵝寫道經

宜江元旦

北望天門拜冕旒宜江晴色滿雲浮故人作郡分銅虎  
新歲行春見土牛花外樂催銀甕出宴餘香逐綵旗收  
喜聞近日平諸寇坐使今晨散百憂

和余太守對雪見懷二首



江雪寒連驛樹遙，鶴裘清坐聽蕭蕭。  
中天月避光芒合，南國雲含瘴癘消。  
因憶玉田春種石，乍疑銀漢夕通橋。  
使君辛苦迎驄馬，也念幽居寄閬寥。

聞道停車傍水宮，登高懷遠賦能工。  
野寒鷹隼回西日，沙晚鳬鷺聚北風。  
留客每勞分祿米，憶家時擬問歸蓬。  
陽春欲和休論寡，且共長歌答歲豐。

送元景說赴茶陵學正二首

一官分教古雲陽，十月攜家過武昌。  
楓下繫舟晴望岳，

竹間聞瑟暝浮湘炎靈日落思前帝漢廟風悲感故王  
見說此州多士族看君瓊樹映琳琅

憶在京華跨蹇驢每憐窮巷致回車嗣宗曠達元耽酒  
曼倩詼諧早上書萬里盡瞻黃鵠舉三年空憶臥龍居  
今晨振鐸仍南去預擬歸來會石渠

題李子億梅屋

聞君繞屋梅花好絕似孤山處士居雪裏夜疑香隔塢  
月中晴愛影當書洛陽富貴傷華閬江國風流憶故廬

昨日宜溪芳樹底相逢春思獨何如

送鄧仁康赴龍泉延慶巡檢二首

一官萬里思求盜南浦扁舟日夜東  
歲莫荆揚江盡落時平甌越路全通  
龍文遠棄泉中劍蛇影高懸壁上弓  
但使一鄉稱善俗斷無豪客嘯秋風

武功頻起漢將軍儒術徒淹鄭廣文  
也為奉親需薄祿便堪乘障累微勲  
同舟夜夢巴陵月行李秋瞻鴈蕩雲  
來歲嶺南逢驛使松舟消息許相聞

別孔學禮

感君相愛復相親，豈有文章解過人。  
書法未通吳郡草，詩名虛擬杜陵貧。  
晴遊別谷留魚日，夜宿幽齋語達晨。  
別後湘江見回鴈，帛書無惜寄衣頻。

送劉子謙赴廣西帥幕

湖南相倚最相知，惆悵征帆欲去時。  
感事每持清論在，憐才猶與故人期。  
邊城南過低榕葉，幕府春來長桂枝。  
舍弟南遊借披拂，書回應得慰離思。

劉煥章山居圖

司空山前處士居白雲千頃映田廬桃花近隔秦人洞  
松樹深回漢使車澗底綠觴浮出酒牀頭青簡著殘書  
畫圖昨日看茅草因憶春畦久未鉏

別劉煥宗

長沙城中夏木清長沙城外楚江明歸人盡日思臨水  
過客常時問入京空有使查通外國每無賓俎置前榮  
相逢又作長途別多謝西山主送迎

答劉雲章

憶昨浮槎傍海回，只令幽館向江開。  
馬卿去蜀誇題柱，郭隗居燕築臺將。  
詩豈敢逢人誦，載酒空勞共客來。  
况復扁舟雨中別，為君臨發重徘徊。

巫峽圖

十二峰前江水東，疑三蜀路相通。  
青天鳥影連巴峽，落日猿聲近楚宮。  
每有客舟來繫樹，豈無仙袂去乘風。  
古來奇絕空傳盡，今日何人賦最工。

覓白雞

君家白雞異凡種變化恐是西方精食尋丹白過雲影  
栖近書窓亂月明山雞映水徒相疾野鶴同林總不驚  
許寄雙雙超畫舫竹棚先稱雪毛輕

寄方君恕

聞君臥疾近如何閉戶時應賦短歌安石或能攜妓出  
予猷常擬棹船過微風倚檻宜修竹落日臨池愛綠荷  
也念湖邊未歸客秋山回首白雲多

送張秀才北上時將赴海南

身逐征帆赴海涯  
道逢行李問京華  
涓人解致燕王馬  
卜史工占蜀客槎  
蓋早朝星在樹  
管絃春宴月當花  
盛時繁麗應如昨  
把酒聞鶯肯憶家

夏仁仲蘭坡精舍

君家別築蘭坡上  
好事能來共讀書  
九畹入雲秋色迥  
八牕通月夜光虛  
唯須殺竹傳科斗  
不待收芸辟蠹魚  
聞說四方來已衆  
買材更擬廣樓居



岳陽中秋值安南貢使因懷舊遊

洞庭秋氣滿龍堆為客偏驚節序催  
鐵笛乍聞雲外過瓊樓應傍月中開  
越裳重譯三年至溟海浮槎八月來  
忽憶舊遊今萬里天涯長見鴈飛回

送葉天惠

岳陽學舍古城陰歲晏憐君賦子衿  
傳業豈憂名未立愛親恒畏老相侵  
天門挂月烏啼冷夢澤連雲鴈去深  
憶我舊遊如昨日逢人離別損鄉心

歸舟阻風

洞庭十日風勢號沙頭客舟如係匏沅湘九道白波立  
衡霍千峯玄霧交神龍欲蟄無定窟黃鵠將歸愁故巢  
咫尺城樓不得上何因一望楚江郊

潘彥賓雙劍圖

延平津頭兩神物自是豐城金鐵精一朝變化風雷合  
八極轟騰烟霧生黑螭海氣通無底白射虹光簸大明  
巖穴誰能識霖雨形求先已慰羣情

余嘉賓伴送南使因過家岳陽有詩寄牋和答  
越裳貢使出皇州送節南來滿路秋乘傳過家須倍喜  
擁旄歸國莫深愁南宮雨露通仙館東壁星辰接御樓  
也念故人炎海去都門何日却相求

王氏相師山莊三首

相師之山雲窈冥千崖萬壑倚空青上方雷雨藏天井  
南極風烟落洞庭溪客去迷花藹藹野人居愛竹泠泠  
何時遂買登山屐乘興還來叩石扃

王子高標玉樹秋是中泉石稱風流勝同輞口居摩詰  
清似山陰過子猷一壑風烟臨載酒百年才思接登樓  
田園日涉今成趣還憶前人感釣遊

郊堂聞在斷崖居耕鑿真疑與世疎黃石洞依秋樹冷  
子房祠映古苔虛山人自述潛夫論部使空求處士書  
見說田間多野興每慚為客負犁鉏

雪中舟過武昌寄黎別駕二首

日南老子擅文章自昔來朝住漢陽二頃賜田家僅給

百年歸國路偏長，藏書每欲存科斗。  
吹管猶能學鳳凰，近日還聞厭城市。  
題詩多在水西莊。

八十之翁恒苦吟，一懷故國一傷心。  
千兵入越年猶少，九譯朝周歲已深。  
汗竹功成青史後，結茅興聚白雲陰。  
江頭歸客勞相憶，雪夜扁舟何處尋。

答何大成

別來短髮不勝搔，千里還家一緼袍。  
開徑自驚春竹冷，過門猶記古松高。  
雲中得鴈通書疏，雨裏龍鵝致酒醪。

寂寞腐儒村舍晚煩君文字數相褒

送月明德經歷赴工部主事三首

清江地狹仍凋弊上府文繁費剗裁忽報郎官天上召  
遂煩使者日邊來考工夙已明周禮利用猶宜致楚材  
忽有去思情萬疊數占雲氣望蓬萊

明公為政已多聞久客還家喜識君始信明珠能破濁  
也知良驥蚤空羣分明漢策存經術零落秦書見籀文  
此去扁舟各南北天涯相憶萬重雲

儉府才華奪上賓各官僚屬近清塵月寒烏鵲愁依樹  
日落狐狸喜瞰人鄉校久歌公在泮興梁令見客知津  
獨令文字存遺愛此日誰能借寇恂

贈陳與之

處士窮居已白頭春來思泛五湖舟不逢太守知徐孺  
空使時人惜鄧攸一代衣冠餘老大百年文物見風流  
承家獨恃諸孫好奉杖相逢慰客愁

贈壽上人之五臺約歸同虞學士遊匡廬

飛錫初聞度嶺頭，看山復作五臺遊。  
天花雜遝來獅座，海樹微茫滅蜃樓。  
即可是中依上首，更於何處覓同流。  
頗聞李白匡廬下，遲子歸來共汎舟。

贈黃仲宣

君家城南當市喧，昔者讀書恒閉門。  
三年作吏淹下邑，一日辭親遠故園。  
塵裏驪駒久困辱，雲間黃鵠即飛翻。  
業成願子勿留滯，堂上春來思樹萱。

送孔伯吾拜祖林



三孔風流譜牒存祖林迢遞隔中原家全科斗經秦世  
路逐爰居過魯門闕里蒼蒼雲樹合闕宮寂寂雨烟昏  
始知聖德同天地長使恩波及子孫

和楊支直度嶺韻

使君三月嶺南還五馬翩翩曉度關郡邑去思多下淚  
道途安穩一開顏粵音勸酒通殊俗漢隸題詩徧近山  
聖主求賢念耆舊丘園那得便投閒

高明樓

江上孤城映水回，市中層構出塵開。  
衡廬樹入青天盡，章貢波翻白日來。  
每曰陳登門有客，最傳王粲賦多才。  
闌干百尺應能借，乘興誰同月下杯。

贈劉天子

每聞章貢多奇術，不獨揚曾得異書。  
龍憶葬時天子至，鶴疑仙後世人踈。  
幾家華屋成高冢，千載青山照倚閭。  
此日因君聊借問，劉郎荷插意何如。

送純德中

翩翩杖錫響空飛五月松風滿翠微禪悟已將詩共入  
道孤元與俗相違匡廬迤邐盤秋霧禹穴蒼茫散夕暉  
此外名山何日徧優曇花發及時歸

題胡伯有官溪山閣

湖上羣山浮翠陰山阿高閣湧清潄天虛彭蠡風帆盡  
地下鍾陵霧雨深文字數從名士得壺觴頻約故人臨  
却憐城府無仙分咫尺溪源不可尋

贈侯務本

異人墨訣世稀聞，病起論方喜見君。  
即貢尚方知不媿，偶來蕭寺許同分。  
匱開玄豹春含霧，圖戲驪龍畫起雲。  
從此臨池增筆勢，書成祇恐費鴛羣。

洪都再贈

憶昨相過憶素聞，鍾陵五月更逢君。  
題詩豈敢傳千里，學字空能愛八分。  
樹裏叩門衣帶雨，竹間試墨硯生雲。  
送行忽起青冥思，黃鵠高飛自不羣。

送楊仲剛之藤州學正

蒼梧之南多樹林石州蠻舍鬱蕭森紫藤影落書帷靜  
青桂香依禮殿深殊俗干戈恒滿眼古人庠序最關心  
親逢舍弟煩相語日望鄉書抵萬金

題陳可立所藏邵庵書畫後

丹青不見王中允歌賦長懷杜拾遺一代風流傳妙墨  
百年勝跡寄清詞驪珠出海人能得白璧連城世鮮知  
從此華峰多寶氣斗南中夜起相思

美陳蘭寶州判新修高風書院

聖賢祠宇高峰下風雨漂搖感慨多興學遂煩新柱石  
來游不使廢弦歌旗臨碧水晴雲動碑映蒼山夕照過  
遺愛百年何所係諸生朝夕誦菁莪

羅濟川百鴈圖

天南鴻鴈百為羣澤國微茫島嶼分飛逐稻粱時共集  
宿驚蒲葦近相聞瀟湘夜渡霜浮月渤澥春還水映雲  
坐數脩程感行客揮弦目送總紛紛

答張德暉

昔年為客上燕臺身負虛名媿不才處士有星今始識  
故人如雨日同來應憐薄宦趨南海豈有雄文動上台  
欲答新吟正惆悵渴心先近嶺頭梅

送普上人遊浙東柯學士

寒山寺前江氣深吳王池苑正蕭森  
楓根繫艇秋重到竹裏懸燈夜獨吟  
禪客往還無定蹟古人興廢不關心  
將詩為訪柯供奉想見揮毫風滿林

答張仲韓

君家華鄂映堦除紅頰修髯畫不如樹下酒香留客醉  
竹間詩就遣兒書高飛每喜瞻黃鵠遠別親勞賦白駒  
海上他年却歸日維舟還覓故人居

送釋道原遊方

九江東去盡滄溟無數雲山擁地靈金屐春遊雲滿路  
木林夜渡月浮燈有時鶴下愁衝錫何處龍來喜聽經  
踏遍諸方應得道故鄉烟樹正青青

周尚志同歸寓所適寺門已閉會宿張伯龍宅



清秋為客依僧寺落日逢君過客窗並座總看人似玉  
臨觴反畏酒如江曲終別院歸銀燭鐘罷迴郎閉石幢  
已去却還仍不惡論詩未覺寸心降

和韻送虎恕齋侍父降香玉笥

蕭水東南翠作堆洞天飛路躡崔嵬晴林守虎花含霧  
或作舞非陰壑行龍樹起雷使者旌幢天上至仙人環佩月

中迴隨車況有雙珠在一作樹靈雨霏霏濯暮埃

王顏復丹墨

妙墨早傳烏玉玦，洪爐更伏紫金丹。  
研磨盡日資文字，服食何時致羽翰。  
雲中雞犬飛皆去，燈下蟲魚注未乾。  
此訣定從方士得，異書寧遣俗人看。

題渝南黃敬道耕鋤所

州橋南畔足田廬，應避囂塵遠卜居。  
傍舍水泉通金錡，隔林烟火映犁鋤。  
行人午值田中飯，過使春停樹下車。  
見說全家咸隱服，或作起白頭賓敬晚如初。

贈陳秉溟

善相地理星命

聞子奇胸貯海濤逢人永鑑察秋毫浮槎夜歷飛星近  
扶木朝廻出日高預知仙家來孤鶴親見神山戴六鰲  
河伯尚來空自負擬垂鵬翼共遊遨

送胡漢傑北上

我昔尚幼君壯年下筆看君詞湧泉離羣每獨吟招隱  
懷舊何因訪草玄長卿志大新還蜀樂毅才多晚入燕  
此遇貴游如見問煩君為出贈行篇

寄別林允恭兼簡其子鍾英

為客常年去里閭歸來蹤跡到城疎  
期人每恨違雞黍  
憶弟頻勞致鴈書  
逐祿令晨頻海去  
卜隣何日對門居  
知君膝下斑衣好看竹焚香意自如

赴廣經九牛驛次文居安韻

自憐薄宦尚南遊  
共載人疑李郭舟  
傳舍風烟停驛馬  
使槎河漢犯牽牛  
雨逢對語恒連夜  
霜角同聽况值秋  
海上到時應歲莫  
知心獨倚慰離愁

奉陳怡菴憲使二首

故家持憲起儒流，遠道觀風控上游。  
操存須與古人侔，西江紫氣收龍劍。  
南海清霜薄蜃樓，從此殊方無反側。  
坐令重譯頌咨諏。

奉使南行載爾書，小儒從役謾崎嶇。  
題柱祇慚駟馬車，此日微官猶蹭蹬。  
蚤年獨學况蕭疎，目今泮水親時雨。  
會激長江起涸魚。

次韻劉侍中春懷

天涯懷抱非春事，海上晴光忽暖風。  
萬里厭隨游宦遠。

一樽喜得故人同  
樹陰展席閒揮塵  
松外停車遠避驄  
想得故園寒食近  
榆烟花霧近濛濛

武昌送友入蜀訪故

黃鶴樓南水接天  
送君西湖錦江船  
風高馬閣蒼霞亂  
日澹龍門白雨懸  
慷慨欲題司馬柱  
辛勤應預子雲玄  
故人置榻遙相遲  
明夜春山隔杜鵑

題棲碧山為淦龔舜咨賦

揭文安公云予欲賦棲碧久矣興無由起一日臨江

傳與礪來開卷同賦之余詩未成與礪已就非不可更作念無可以過與礪也遂易結語而已

山人愛山如李白幽棲還在碧雲深松杉繞屋清宵響雷雨懸崖白晝陰石上每同仙客坐花間猶恐世人尋京華日日多塵土終擬投簪話夙心

傳與礪詩集卷六

欽定四庫全書

集部

傳與礪詩集卷八

詳校官編修<sub>臣</sub>曹錫齡

中書<sub>臣</sub>劉源溥覆勘

總校官進士<sub>臣</sub>

朱銓

校對官中書<sub>臣</sub>

高中

謄錄監生<sub>臣</sub>

施

華



欽定四庫全書

傅與礪詩集卷七

元 傅若金 撰

五言長律

壽陳景讓都事四十韻

四月十八日

種德由來遠流芳信有苗名門多令器夫子最高標地  
迥瞻崧岳天清見斗杓聲名從結髮問學自垂髫江漢  
棲遲久林亭興致饒紫蘭敷一作依月露蒼竹倚風颭畫

艇移書放秋燈把劍挑微名寧屑屑高志獨囂囂五氣

乘昌運羣英集聖朝武功收赫怒文治付宣昭歷數初  
歌禹聰明已贊堯求賢當晏食夢帝起中宵石室仍高  
隱金臺歛見招賜書懸日月乘傳出雲霄議論紆三顧

榮光

或作名非

動百僚入宮催護璽趨府聽鳴鑣郊社陳周

禮神人協舜韶出關春衣繡分陝夜乘輶解觸心彌壯  
豺吞膽共銷封章猶懇切歸思遽飄飄袞職江湖隔鋒  
車道路遙凝旒思穆穆行李發蕭蕭典祀尊原廟承釐  
洽大寥步依文石進香近黼裳飄白日明驄馬清霜急

阜鵬帝裾遮道引諫草避人燒佐省持三尺繩民究八  
條兵曹多暇豫卽位益崇超所向才華冠何曾意氣驕  
臺評推妙畫士望慰深翹引拔一作進連茅茹芬芳雜桂

椒銀章看且佩金鼎竟須調小草方慚出浮萍久恨漂  
文章殊豹隱篆刻近蟲雕徐穉矜懸榻蘇秦惜敝貂敢  
期充砥礪猶幸致芻蕘黃鵠追高舉青松託後凋火行  
占孟月星聚識生朝壽酒開雲液仙音出鳳簫祇應成  
遠業未可慕松喬

多一作置

送孔惟中再謁祖林

吾郡稱文物君家續聖賢  
尼山懸日月野樹隔雲烟  
追遠逢昭代遊方反盛年  
北通三仲譜南下九江船  
雁起垂綸外鷗飛解纜前  
水涼聞雨坐沙暝望星眠  
岱岳遙臨海河流遠自天  
路詢洙泗境人指鄆謹田  
日觀朝輝接風零暮色連  
闕宮偏寂寂關里獨綿綿  
翠合知林墓顰飛識廟堧  
趨庭槐氣潤拜下柏陰圓  
蚪蚪殘書帙旋蟲壤樂縣  
圖稽始祖出世別小宗傳  
遠近論昭穆尊卑

齒後先杖栽楷木淨冠截檜皮堅舊俗聞詩禮遺儀見  
豆籩玉傾當別酒珠寫贈行篇古道嗟環轍長途勸著  
鞭京師同逆旅瀛海限飛仙賦或君王問貧應故舊憐  
苦嗟冰合硯危坐雪侵氈魚目從人貴蛾眉祇自妍猶  
懷薛氏劍未絕伯牙絃卒業思歸魯離羣遽發燕霜蹄  
終奮迅風翼暫廻旋文憶來時把詩要去日聯綠蕪  
思滿青柳別愁牽為客慙烏鳥因君感杜鵑  
使頻寄彩雲箋

送彭叔嶼歸臨川却之尼山山長

毓聖由天縱鍾祥絕地靈  
文開周宇宙神照魯郊坰  
泗水烟中白尼山日下青  
古祠留草創遺躅接音形  
綿蕞來諸子簪蕭享二丁  
祭田侵後廢植木亂中零  
嗣續仍詩禮衣冠足典型  
麒麟思繫紱蚪蚪慨遺經  
建學謀官守推賢慎委令  
百年興曠典一語動明廷  
有客真英選多才更妙齡  
每看明匣劍羞對讀書螢  
北極憑一作凭元氣中台會德星  
駿收燕市馬甘薦楚江萍  
紫電纏鱗鬣

清霜整鶴翎久疑淪浩蕩忽作附青冥被檄趨鄴邑從  
人訪孔庭高堂須覲省歸路正伶俜里父窺蘿逕家人  
閉竹扃壺觴春灑灑怪火曙熒熒還舍雖云樂之官不  
可停雲高瞻泰岳雪盡見滄溟驥服長驅阪牛刀始發  
硯宮牆上日建弦誦坐時聽歲月登倉庾春秋具鼎鉶  
市通槐下道壇築杏陰亭銀漢侵題榜丹霄映勒銘育  
材須杞梓醫國備參苓木鐸流聲教染盛著德馨乾坤  
吾道在常使萬邦寧

寄題番禺周子震金漳山居

大氣生磅礴元功接杳冥江開吳楚白山矗斗牛青玉  
牒呈天秘金潭泄地靈百盤工取勢千疊互殊形石吐  
高低筍峰羅大小屏忽如森隊仗復似倚娉婷六六移  
諸洞三三映列星靜宜營道室幽或下仙輶客有依文  
物兒皆尚典型卜藏思買宅佩訓謹趨庭娛老心能遠  
登高步每停艱難成宿志窈窕慰千齡雨潦供漂木神  
祇助薦牲史留徐穉傳碑勒蔡邕銘碧水通銀漢蒼霞



護石扃暝迷中谷路晴見隔溪亭鳳穴含飛旭龍湫蓄  
震霆倚廬浮晡霽行徑俯清泠鸞鶴軒羣岫龜蛇汎遠  
汀陰陽相抱負存沒總安寧種竹期成實栽松擬伏苓  
久居隣叹息清誦野猿聽夜燭吹藜杖朝餐啜土銅馬  
卿能作賦韋氏舊傳經伯仲翔鵬鷲東西念鵲鴝辟雍  
初識面京國共漂萍磊落珠藏積光芒刃發硎即看培  
遠業誰得限脩翎何日過彭蠡從君載醪醕遂求靈運  
屐一往眺林垌

送孔學文之湘鄉州判

郡邑頻騷動朝廷失撫綏君繇先聖出政學古人為北  
極迴旋裏東門祖餞時家從天上挈官自日邊移雪樹  
違燕市風帆掠楚祠大江開浩蕩靈岳見參差候吏迎  
皆喜州人到恐遲苔虛蔣琬宅竹淨褚公池閒暇應攜  
酒登臨得賦詩此邦稱富庶今代益蕃滋地氣湘潭會  
天文翼軫垂山川曾屢涉風土向來知秔稻金纏穗松  
杉翠壓枝魚肥春雨窟牛滿夕陽陂禹貢連三澨虞巡

接九疑至仁終遠被淳俗未全漓豹隱多文彩鴻飛足  
羽儀五兵閒警邏千耦樂耘耔聽訟寧求異觀風政在  
茲治成聽舉最萬里慰懷思

送陳道之獻書南歸

天子尊圖史朝臣念布韋著書心力苦為客鬢毛稀雷  
雨羣龍會雲霄一鶚飛文風吾郡最經術古文微夫子  
辭家塾前年入帝畿塵埃白羽扇燈火絳紗幃訓傳多  
修補文章併發揮揚雄終得薦劉表暫相依歲月初何

晚乾坤事每違買臣今日貴伯玉幾年非畫省俄傳檄  
青山遂拂衣嗟予同邑里奉使隔庭闌路出將軍柱河  
經織女機艱難成國典安穩恃皇威燕薊繁霜雪衡廬  
老藤薇那知萬里道能及一時歸南海連春霧西江遠  
夕暉他時兩相憶何處採芳菲

送幻上人還高麗

梵宇通遼海僧居屬弁韓鰲依三藏立龍近衆香蟠異  
域今為一遊方故不難繡幢來日下金刹滿雲端世主

多尊佛沙門總授官衣傳中土徧錫掛上方寒網樹珠  
垂絡香林寶刻欄况茲窮壯麗知爾久盤桓故國春頻  
至長途雪又殘風沙歸寺遠歲月作程寬日落經華表  
天窮得翠巒木杯過渡穩蓮座出波乾暮雨鳴齋鼓春  
風倚釣竿誦經泉客聽傳鉢海神看行住都如幻虛空  
未足搏路應歸後憶雲向坐時觀紫極迷天樂青霄隔  
露盤如逢國王問為一作還說聖人安

送蘓伯脩侍郎分部扈蹕

扈聖千官出分曹六職俱侍郎精古學議禮應時須車  
蓋連諸郡衣冠接兩都勾陳嚴內拱屏翳肅前驅灑水  
開宮殿龍門起畫圖仗依雲氣肅人望日華趨馬酒來  
官道駢羹出御厨露疑金作掌氷想玉為壺地絕分寒  
燠天清習曉晡會朝常咫尺奏對祇須臾舊俗懷周雅  
今賢誦禹謨愛君期得道憂國況為儒久客嗟牢落諸  
公念朴愚路經南粵險心戴北辰孤汲引勞脩綆吹噓  
倚大爐臨風思何限相送獨勤劬

議禮一作儀禮

送胡繼史赴道州知事

天子綏荒服，郎官映列星。  
銓曹嚴遴選，幙府待儀刑。  
迨遞蒼梧郡，微茫有庠亭。  
玉京秋始動，金掌露先零。  
去路緣湘竹，歸船傍楚萍。  
道詢虞舜治，江弔屈原醒。  
丹極元非遠，蒼生久未寧。  
忌投傷器鼠，思去食心螟。  
五嶺當羣盜，千山震百靈。  
日光兵後白，雲氣瘴餘青。  
憶昨過洛水，尋君隔洞庭。  
北來還邂逅，南望正玲瓏。  
網罟今逾密，干戈歲未停。  
浩歌懷古昔，遠別戀朝廷。  
久客緣三釜，時人

笑一經看君萬里翩從此薄青冥

送張尚德之銅山巡檢

尚德名仁偉渝人庚申鄉貢

紫氣開霜匣青雲倚玉梯才名淹下第文學借卑棲度  
嶺初還北浮湘更向西直求乘小障不作歎朝蠶地險  
連三峽天迴帶五溪夜郎花外隔盤瓠竹間迷獨木剗  
船小荒茅覆屋低自從歸舞羽應總事耕犁秋嶂沉烽  
燧春亭靜鼓鞞弓刀閒暫閱翰墨醉多題玄豹終辭霧  
蒼虬豈戀泥去鄉殊出處行道各扳躋離別腸堪斷留



連手重攜上林頻候雁中夜共聞雞歸路何由並生涯  
苦未齊千峯獨南去心折鷓鴣啼

登南岳次黃次舉韻

楚望尊衡岳虞巡比岱宗朝廷隆正祀神物閟幽蹤宮  
殿迴朱鳥幡幢下赤龍玉書何代冊金奏古時鐘雷雨  
中天近烟雲盡日重歲穰資長養時治僊登封行役心  
能遠幽尋興頗濃巖棲多映竹仙徑稍侵松地軸通三  
島天梯挂五峯危簾猿共慄縣瀑鴈相衝羽容嗟長往

飈車不可從自疑流水隔那與故人逢  
江漢低鴻鵠乾坤亂蟻蜂飄零真寄世  
蕭索久成冬山戍喧寒柝邊城起夕烽  
撫時多感慨臨眺敢從容

送尉彥誠歸長沙却之道州經歷兼呈外舅孫公

歸客長沙道之官有庫城府公資幕畫朝士采詩評  
一郡優為理千山遠作程去瞻南岳雁行背上林鶯野店  
逢花發江帆及水生過齊鄉吏識入楚路人迎問字從

兒好收書任僕爭淥醺春酌暖瑤瑟夜閒清禹鑿遺天  
險虞巡畀月明感時雙鬢改懷古寸心驚盜賊連饑饉  
科徭半甲兵實憐民未息深倚政能平儒術寧迂闊人  
材自老成湘東見吾舅遺世獨何情

詩一作時

### 送楊翼之還清江

同郡晚相得還家君獨先艱難萬感集離別衆愁牽盜  
賊凶荒後干戈餉餽前故園思縮地行路歎登天郡國  
方收馬江湖總稅船遂嫌居鬱鬱竟作去翩翩芝嶺寧

忘世桃源似欲仙  
游鯤輕萬里歸鶴異千年  
已謝蘓秦印無論祖  
逖鞭道瞻匡阜雨山背  
薊門烟遠色芙蓉浦  
濃香穠稭田藏書猶有  
壁坐客豈無甄我亦懷  
三釜誰能乞一錢將詩  
不敢寄多是斷腸篇

牽一作連  
竟一作裡

奉送蘓善御史赴河南憲僉十二韻

聖治尊儒術賢才翼帝躬  
立朝防觸豸行路避乘驄  
復道河南去先愁冀北空  
激揚元自任出處豈謀同  
地絕看持節天長惜轉蓬  
繡衣今日把尺素幾時通  
別酒花

開裏征帆木落中  
薊門懸夜月梁苑度秋風  
古縣藤蘿碧霜林果蓏一作實  
紅咨詢行每徧閒暇賦能工  
白日明高岳黃河遶故宮  
登臨興何限題寄北飛鴻

和錙子簡國學冰

凌室晨披霧雖宮夏薦冰  
水晶持欲滴玉氣望如蒸  
積自羣陰漸堅非一夕凝  
碧涵天左轉紅射日東升  
貯盃寒疑漏侵衣薄未勝  
戰休牀下蟻飛失坐中蠅  
病肺清堪滌飢腸冷易乘  
詩因詞客誦書憶史官稱  
潄水嗟王

霸陰山惜李陵時平銷甲馬歲足賦金繒二氣須調變

諸公正業競寄言老成子四序莫相陵

列子老成子學幻於尹文能翻

校四時夏造冰

登岳陽樓

馳傳自青天憑高憶往年闌干映水迴埤垠與雲連水  
會沅湘大山侵楚蜀偏裒郎通別井龍女宅重淵日月  
鴻濛裏風沙浩蕩前驪珠秋後冷犀火夜深然張樂猶  
疑奏乘槎欲並仙登臨停去騎寵餞惜離筵地氣南交

接天文北極懸賦慙王粲作詩擬杜陵傳渺渺衡陽鴈  
迢迢浪泊鳶早春回漢節應得汎湖船

泊一作拍

歸自安南贈中書掾凌仲明

皇帝初登極殊方總入朝忽逢歌遣使因得佐來輶  
白  
日臨丹徼清秋滿赤霄三湘緣沮洳五嶺度嶢嶢旗對  
風烟動衣垂瘴霧飄解裘輕陸賈投筆愧班超賞典仍  
叨忝文風正寂寥玉衡憑氣運金鼎待人調掾省遭時  
彥憐才似久要共成毛義喜竟免介推燒山雨知玄豹

天風仰皂鵬逢人寫懷抱聊復寄歌謠

題方叔高木齋

種樹千章合開軒四面臨徑微通窈窕簷迥起蕭森風  
雨行春氣雲霄落午陰碧從脩竹間青任古苔侵養鶴  
幽時下垂猿密處吟都因結構好逾覺往來深花發明  
開卷藤懸拂挂琴閉門唯淨石倚杖即深林寥闊天涯  
夢迢迢歲暮心歸舟過彭蠡思爾定相尋

奉和蘓授經八月二十九日明仁殿進講敕賜



酒饌許乘舟汎太液池趨西苑之作二首

東壁圖書出西周禮樂修燕閒催進牘清切近垂旒聖  
學天俱運恩波海共流萬幾思至理三歎賞嘉猷紫氣  
當筵駐青雲滿殿浮賢應通隱滯佞豈進俳優虎觀風  
移仗龍池雨送舟詞章唐后或作後非恥訓詁漢儒羞明主  
虛能受諸公問即酬六經懸日月何止鑑千秋

聖明思善述耆舊倚交修虎豹開闔闔山龍照冕旒日  
臨丹宸動雲拂翠華流獻納稽前古都俞協大猷几筵

花氣合圖史竹光浮當宇經綸遠尊賢禮數優內厨深  
出饌西苑近迴舟禁鬻由來貴溪毛庶可羞遙勤三顧  
問各奉萬年酬牢落南州客相望奈九秋

送余觀嘉賓及第歸岳陽却赴常寧州判

主上徵多士郎君最少年絲綸三殿出名姓九賓傳月  
桂浮丹籍宮槐拂綵筵爐烟一作香攜去重袍色賜來鮮

鴈塔青雲繞龍門紫霧纏聖謨恭已治文德待人宣日  
月南垂楚山河北奏燕洞庭飛鳥外衡岳亂帆前祿喜

娛親足官聽舉最遷京華未歸客臨別意茫然

送無外式上人還高麗

萬國山河混三韓道路通都因聖德遠兼使佛書同持  
鉢遊天上乘杯自海中烟沈孤嶼白日湧大波紅入夜  
唯瞻斗經時只信風本從箕子國來覓梵王宮到日過  
春草歸程及早鴻將詩猶恨少問法久知空鴨綠遙連  
北雞林更在東他年許詢輩何處訪支公

九月六日壽許中書

宇宙生良弼朝廷得鉅儒  
九秋頻落帽三日記懸弧  
露氣流金掌天文繞玉樞  
人皆瞻稷契世擬見唐虞  
日月懸雙闕風雲會兩都  
治分黃閣坐朝向紫宸  
趨夙昔聞周禮從容進禹謨  
神仙何用學廊廟竟須扶  
瑞世知龍馬傳家見鳳雛  
今辰對佳菊爛醉把茱萸

內丘縣舍

歲月催行役塵埃廢苦吟  
懷山叢桂遠入縣古槐陰  
道倚相如節堂虛子賤琴  
厨人輸傳食稚子解懸衾  
風露

占秋早星河識夜深履聲嘶秣馬燭影動棲禽暗漏時  
時鼓寒衣處處砧海邦圖上見江國夢中尋翌日過洛  
水何時到象林北來常早起王事最關心

送程伯舉還新安

南宋衣冠盡東吳閱存風流成異代文雅見諸孫近  
日來京國因秋憶故園知交無復在羈旅更堪論舊隱  
藏山色清江落水痕出愁楓樹老歸愛菊花繁庾信餘  
幽賞陶潛避俗喧窻風晨下鶴澗月暝啼猿竹淨臨書

卷松高蔭酒樽雲林真可樂軒冕未為尊

送廬陵范會宗入京省兄朝宗

大范留京國齋居接棟梁端門通籍晚望苑曳裾長遠  
客逢難弟諸公比季方題詩晴望岳載酒夜浮湘萬里  
懷燕市三年厭楚鄉旅游成獨往兄在慰相望馬酒宜  
風土狐裘耐雪霜况聞周選舉不廢漢賢良紫電依龍  
種青霄屬雁行故人多在北應念獨南翔

北一作此

送安伯寧知沔陽府

久說二車賢新聞領郡專被書辭北極建節指南天水  
國春為市沙村夜種田雞棲桑雨外魚網荻風前山獻  
荆人璞江通郢客船使幡當竹過賓尊隔花傳訟獄平  
如水閭閻望若仙政成聽舉最勲業進貂蟬

過小孤山

怪石成孤島長江瀉亂淙人愁造化蹟神閼往來蹤落  
勢懸千仞盤根下九重浪侵緣岸釣風應隔林春陟險  
尋幽洞憑高對別峯船依鐵柱過廟受聖書封厓絕纜

通鳥潭寒欲起龍經過毛髮豎不敢久從容

題米仁昭別駕所藏幽篁古木

黃落催寒色丹青著苦心幽篁依磊砢喬木映蕭森  
鳳青霄迥蛟龍白晝陰靜疑風動壁清畏雪沾襟  
落日愁空谷寒天憶故林風烟三逕晚霜露百年深  
汗簡誰能任浮槎不易尋他時愛清節對此脫朝簪

詠常寧新鐘東余太守樊別駕

牧守新民聽鈞陶協化功采山羣力會趨冶百心同紫



氣干南斗玄陰散北風警時成器大傳世勒辭工遠響  
號神獸奇文遠怪蟲主司嚴旦夜撞擊破昏聾冰雪懸  
天半雷霆隱地中自今聞政最歌頌總無窮

題禪居山雲堂

丈室蟠青嶂千峰起白雲樓臺數步隔鐘梵半空聞衣  
潤寒偏覺人來近始分樹陰當黜霽豁影度網緼地迴  
藏靈氣天清斷俗氛寸心無著物五色自成文細雨傳  
春誦微風坐夕曛是中支許輩吟嘯日為羣

太學上丁

秩秩嚴明祀煌煌闢孔祠橋門多士集齋廡庶官隨禮  
樂循周典衣冠雜漢儀進牲雲覆俎揚燎月當墀道並  
乾坤大文從世代宜恭惟歌聖德詠歎不知疲

竹深亭

華棟依林下幽篁接澗阿夏陰當座滿秋氣近檐多修  
潔同冰玉蕭條帶薜蘿映書光可把侵袂翠相和山阮  
時俱集求羊日共過知君少塵事歲晚得婆娑

七言長律

奉和宋翰林顯夫御溝詩韻

宛宛長波切太虛  
霏霏晴霧濕高居  
雲涵度影翻玄燕  
日映圓紋散白魚  
遙轉石陰通樹細  
稍侵花底出宮徐  
橋邊市起春鳴轂  
閣裏朝回晚曳裾  
天子數臨窺碧藻  
詞臣時勅賦金蕖  
龍池浩蕩恩波接  
草木無情亦勝予  
送鞠希仁友仁及第歸岳陽却赴邵陽縣丞兼  
寄楊秀才裕

巴陵一別鴈來頻京國相逢燕賀新  
桂殿日浮金榜曙杏園雲散玉壺春  
董生對策真能事轅固談詩恥後塵  
悄悄聞雞持別袂蕭蕭拔馬送征輪  
荆衡地闢通南極幽薊天回倚北辰  
湖草欲青應進舫縣花初白肯懷人  
長卿實畏貧歸蜀季子徒聞早入秦  
為報揚雄休識字少年直恐鬢成銀

登石鼓山

歸途訪古駐征鞍懸棧通幽繞曲闌  
故老尚傳唐棟宇

諸生猶識魯衣冠  
弓封後洞蒼靈濕  
樹蔭西溪白日寒  
諸葛祠前沙浩浩  
昌黎碑下石團團  
山浮岫嶺晴時出  
江合瀟湘地底蟠  
也擬題巖記行迹  
詩成祇畏萬人看

寄題吳野夫竹松齋

蒼松修竹繞茆廬  
中有幽人事隱居  
琥珀入雲閒後斲  
琅玕經雨靜來書  
鏡湖冷逼秋聲早  
禹穴晴通曉色虛  
野客每能攜酒至  
隣人時共帶經鋤  
更培老樹看巢鶴  
休損長竿學釣魚  
霜雪欲開千畝外  
棟梁動計百年餘

子猷興致從人怪元亮生涯本自疎  
南望風烟限林壑京門久客正踟躕

送觀至能赴廣西憲司經歷

薊門官柳徧鳴禽馬上離人酒強斟  
久以才名稱闕下忽持風裁一作采照江潯  
三湘曉雨開衡岳百越春雲接

桂林何遜到官勞賦詠謝安攜客喜  
登臨吏人靜佳山城僻部使閒過幕  
府深溪裏藥苗寒自綠道傍榕樹晝  
多陰蠻夷比歲頻騷動巖壑何人更  
討尋明日孤帆逐

君發長沙南望最傷心

畫一作暑

送楊好問裕北上

京國衣冠集勝流  
昔年恨子不同遊  
夔龍禮樂開經濟  
班馬文章寄纂脩  
此日送君須決去  
諸公薦士足深謀  
金門夜奏三千牘  
玉座春瞻十二旒  
無復風塵淹白日  
也知雲漢倚清秋  
明年海上還相念  
應有書來慰別愁

傅與礪詩集卷七



欽定四庫全書

傅與礪詩集卷八

元 傅若金 撰

五言絕句

古意二首

人言道路遠直傍天涯去  
頭上忽見天近於江南路  
牽牛一永隔織女經年會  
咫尺闕相聞何況千山外  
雪中訪友人值出飲未歸戲題二小詩

空齋掩深雪知向誰家宴  
徑造不逢人殘書誦皆遍

期君久不至深坐雪霑扉臨當日暮去終同興盡歸

戲效子夜歌體六首

與達兼善  
御史同賦

種荷深水中日夜期成藕蓮子逐浮萍風波漂

一作飄蕩

久

織錦望成疋終朝不滿

一作盈

尺誰知方寸間千絲萬絲

積

儂是弓上弦雖絕猶當續歡如弦上矢一往遂不復

思將儂別淚溢作長江水處處逢歡船任歡行千里

郎心願成鏡照妾生光彩鑄鐵作同心千年亦不解  
歡乘紫騮馬儂作碧蠶絲繫在白玉鞭千里得相隨

古楊花怨

楊花白如雪無事學高飛莫作浮萍草漂零不肯歸

即事

官家禁弓箭不得行人把猶聞馬上寇殺人青山下

金竹道中書所見二首

日上清霧開山虛翠烟集紛紛羣木中時見孤松立

巨木為人伐細木森自蔽作書諭松柏材大何足貴

陵州

遠道千峰隔長河萬折流風帆不可住今夕過陵州

慶都道中小憩

暑路宜官柳風亭厭旅塵伶俜七尺影偏與太陽親

至藥城使者亡其弓戲題

兵革三邊靜蠻夷九譯通猶持漢使節莫問楚人弓

衛州值雨

大澤泥淖多今朝復秋雨不畏道路長惟傷馬行苦

題衡陽驛

南來山不盡北望意何如恨殺衡陽鴈來時不帶書

題雜畫八首

虛舟不得渡立馬垂楊側但見從橋安寧知濟川力  
山翁捐世慮避暑長松裏絕壁無來人諸峯隔流水  
橋危獨騎小江闊羣鷗亂喬木過風帆遙山滅雲漢  
松杉白日冷樓閣青烟暝漁釣倚孤舟風波夜來定

青山宜野服白髮明溪水入暮幽思多微風樹聲起  
空江白鷺起遠樹蒼烟合日落汎舟時長天見孤塔  
烟寺微茫裏漁舟浩蕩前松聲薄暮起寒氣近江天  
岸陰却夏暑水影涵雲樹日暮詩已成長吟不歸去

題墨梅六首

弱水不可舟飈車誰能御羣仙六銖服飛度空中去  
漠漠烟外姿娟娟坐中見分明銀屏影不隔宮粧面  
積雪春不壞疎花冷逾馥心鄙漢阿嬌貯之黃金屋

雪

月下逢素娥清輝寒相照應懷不死藥玉色長如少月  
橫枝交屈鐵疎蕊列羣玉同氣復同心相親不相瀆  
孤花臨極浦子夜宜清景寂寂林下風娟娟月中影

題瓜圖二首

思子成消渴逢人說苦吟最憐貧病裏常有邵平心  
西風吹落蔓白露成秋實對此憶甘寒令人失心疾  
題粹中琅上人所藏墨蘭石四首

雨過蘭發馨枯禪定中起空林聞叱石一夜愁山鬼

三湘連斷岸九畹餘幽境

一作景

墜露不聞聲落星空有

影

幽蘭不為佩白石不受龍寂寂高堂暮蕭蕭來遠風  
泗濱足奇石澧浦多香草荆棘何足除芳堅幸相保

題墨蒲桃二首

小架青烟暝空林白露秋誰家一斛酒遂得守涼州  
上苑根株少流沙道路長也知隨漢節終得薦君王

題墨竹石



雨籀化

一作扶

龍梢風枝咽鳳斂惟應林下石獨稱歲寒

交

墨石枯木

人傳月中樹恐是山河影片石補天餘參差碧雲冷

墨龍

素壁吹大波高堂見神物野人不敢近雷電生翕忽

題水仙

月下湘水寒風迴漢臯夕明珠不可贈捐珮空相憶

六言

荆門牖中三首

春光漸濃燒野晚色遙映炊烟茅店行人喚酒石橋流水通船

桑枝藹藹春暗桃樹霏霏晝晴古徑時逢婦汲閒門不斷人行

江畔纖纖細麥樹頭冉冉晴暉敗垣雞犬相逐古道牛羊自歸

七言絕句

清河口書所見二首

濁浪生愁愁不禁坐見碧水醒人心  
無數飛花當棹落  
幾家弱柳映門深

水市春深雲木稠吟行偶愛寺門幽  
老僧石上因留客  
稚子沙中學打毬

溜溝舟中

人家時見小簷低水驛遙疑曲徑迷  
牆裏桃花多映戶

舍前桑樹總分畦

雜興四首

風吹木葉洒秋清  
憶在湖南江水行  
野色高迷衡岳迥  
湘波寒切壽沙明

秋興亭虛吞遠天  
郎官湖碧照寒烟  
記得徃時黎別駕  
坐吹簫管共回船

洄東之東巴丘高  
在昔登臨詩興豪  
聞笛每吟清夜月  
倚樓長對晚秋濤

老親坐堂白髮生諸弟治家幽意成  
引徑或通梅下過  
疏泉多傍竹根行

夜坐

微月照人不可寐靜夜起坐向前除  
花邊犬吠時時近  
竹裏螢箇箇疎

忽憶

暮雪紛紛舞勢迴忽憶故園花亂開  
江上已應千樹遍  
眼中那得一枝來

寄黎別駕二首

正月已過二月新  
羈客愁生不知春  
近簷細草青尚短  
隔屋小桃紅欲勻

臨水層軒相次開  
炎天幽夢擬頻來  
長江漠漠青天去  
高鳥冥冥白日迴

訪友不值

故人已出閉幽室  
使我獨到去仍回  
夕陽樹裏猶疑見

殘雪街

一作階

中更擬來

奉和存初院使二絕句

上林嘉木陰連牆冉冉遊絲轉日光忽憶江南好晴景  
碧溪春水照鴛鴦

御溝東畔粉為牆雲氣時時汎水光花帶朱橋通蟠螭  
柳齊碧玉映鴛鴦

題貢有源壁間墨竹一枝

一別湘江烟霧深眼中見汝醒愁心長疑碧水猶涵影  
只恨清風未滿林

題方叔高歸羸集後二首

時叔高將  
歸九江

鳳凰城中

一作鳳  
城中

木落時空齋獨夜把君詩最憐庾信

腸堪斷常恐陰鏗鬢蚤衰

歸客長途不可遲千回欲發更題詩佳人苦愛傾城笑  
明月休生按劍疑

寄題進士宋翔仲夢鼎書室四首

淳安縣東鄉蕉源有金紫峯其支阜曰蕉山山北石  
室宋齊丘讀書處翔仲家山南堂以蕉南書室扁焉



淳安縣東金紫峯宋公舊隱隔雲松山人採蔗應常到  
溪客尋花或未逢

聞道蔗南修竹裏小堂清誦夜常勤烟中谷響遙相答

月下泉流

一作聲

靜始聞

宋家窓雞解人語談論

一作笑談

往往能通玄祇

一作祇

應風

雨長司旦安用雲霄並得仙

石室南邊風滿林讀書之處亂雲深頗聞折桂來天上

猶憶捫蘿俯澗陰

題寒梅凍雀圖

寒雀雙棲碧玉條  
竹間疎蕊暮蕭蕭  
幾回憶得江南路  
雪樹參差暗野橋

和陳宗道元夕懷江南絕句二首

月下金渠照夜晴  
雲間玉管散春聲  
綵鸞何處無消息  
閒憶梅花坐到明

萬家行樂愛春晴  
花底遙聞度曲聲  
唯有客窓嫌月色  
照人離恨大分明

駱駝圖

紫駝礫硯動秋雲白草微茫卧夕曛中土向來惟見畫  
都門今日動成羣

次韻王繼志任大瞻訪卧病道者二首

游戲人間只寓形空山瑤草為誰青歸來市上忘仙藥  
卧向壺中悟道經

門前蒼檜古龍形一徑通幽接帝青羽客醉歸因示病  
牀頭顛倒換驚經

彰義門柳

送客都門見柳行幾回  
板折斷愁腸如今自向城西別  
無那柔條拂馬長

逢進包茅使

天子明禋盛禮儀  
楚邦供貢不曾遲  
令人却恨夷吾死  
不見包茅自入時

過真定尉佗先冢

殊方久識漢廷尊  
異代能忘聖主恩  
南粵若逢人借問

尉佗先冢至今存

平安驛

孤燈夜宿平安驛  
欲寄音書無使將  
南鴈數聲秋雨裏  
却先行客過瀟湘

野田

野田風露浥清秋  
扶耒歸來百不憂  
稚子未知耕作苦  
阿翁懷裏學騎牛

咸寧縣

咸寧縣南山色青丁師橋畔水泠泠道邊松樹疑千歲  
便擬尋仙煮茯苓

廣西即事二首

南鎮干戈日夜陳西山寇盜出猶頻荒村百里無烟火  
聞道官軍更殺人

比歲供輸不自聊祇今氛祲未全消陣前將士須殊死  
莫倚功多氣轉驕

安南人以紙立馬求賦梅華

江驛梅花晴照人暗香冉冉拂衣巾可憐結子依或作生非  
南土未得移根近北辰

回鴈峯

江上青峯宿雨開江頭歸使日南來登高欲訪平安字  
二月衡陽鴈已回

武昌春日

鸚鵡洲前芳草新黃鶴樓下綠波春隔花游女烟中語  
不解明珠贈遠人

與黎別駕二首

夜聞車騎亦已到門外雨急故難來明朝狂走須相覓  
終日論文未可回

十分白日淨可悅無數幽花寒自妍眼中此物差慰意  
何時得置小堂前

黃岡曉發四首

黃岡縣西路多石一夜風雨畏行難雞鳴山月淨於洗  
龍過溪雲濕未乾



石磴崎嶇出萬山  
平岡稍復慰愁顏  
樹邊茅屋時時見  
竹裏柴扉往往關

道傍拒霜

驛路迢迢入萬松  
人家時見木芙蓉  
不堪翠蓋烟中冷  
却恨紅粧露下濃

小孤山二首

船渡江天暮色青  
平江峯影動寒星  
海風忽起玄珠樹  
山月遙生綠玉屏

海上夜失蓬萊山九江飛翠落雲間仙人暮暮來絕頂  
徑踏星辰朝九關

偶成

去年詔書禁乘馬今年詔下禁持弓猶聞白晝多豪客  
騎馬射人官道中

金人擊鞠圖

駿馬如雲擊鞠馳衣冠彷彿正隆時向來北地誇豪俊  
不省中原厭亂離

古松圖四首

一寸霜根歲月深，養成千丈氣森森。  
畫師不欲開全樹，來客徒能得古心。

千歲虬枝截古苔，餘姿猶自太山來。  
即今梁棟俱為用，何得山林有棄材。

偃蹇巴陵老樹枝，黃昏風雨使人疑。  
神仙夜過還相識，城市朝來獨未知。

種樹常愁歲月遲，老根千歲與仙期。  
惟應華表歸來鶴，

曾見仙翁手植時

秋潭

百尺寒淵瀉碧峯  
樹根漁艇少人逢  
涼風忽起吹征鴈  
明月還來照卧龍

粟鼠圖

力盡秋原粟始黃  
畫圖逢爾獨心傷  
也知豐歲多遺穗  
不比窮年耗太倉

和陳道之送子歸鄉并寄諸兄四首

弟兄不見長相憶  
況復別離成老翁  
忽夢謝池春草合  
不知姜被幾時同

古屋秋風吹網絲  
難兄誦得寄來詩  
懸知薄暮思家處  
正是清江過鴈時

夜語燈前坐達明  
歸舟還送阿戎行  
微官漸得文章力  
遠道能忘骨肉情

思君盡日令人渴  
忽見新詩手自書  
況有郎君如玉樹  
鬪將花艷比紅渠

即事

五月鑾輿北狩時行人辛苦鬢成絲  
蹇驢日日愁風雨官馬如雲不得騎

墨竹

嶰谷千年倚月明秋來風露最淒清  
自從截作軒轅律別有新梢學鳳鳴

過長蘆追悼故運使趙希顏

此地經過憶往年沙頭樹色翠含烟  
故人何處今埋玉

歸客還來獨繫船

憶昔過君來見君重來何忍復相聞不成挂劍尋秋樹  
空復題詩泣暮雲

舟行二首

倚江雲樹雜生苔風雨蕭蕭中夜來常時行過人不識  
直幹已具棟梁材

漁家日落亂收罾欲及前舟苦未能行盡綠楊三十里  
隔河遙見驛亭燈

無題四首

天台靈草滿溪香，縹緲鸞笙隔洞房。誰見桃源花一作芳

樹裏春來日日待劉郎

江頭芳樹碧重重，中有危樓對楚峯。盡日娉婷綺窓下，看花不使外人逢

樓上仙衣捲薄羅，樓前春暖杏花多。鳳簫最好吹明月，惟有蕭郎自教他

江草離離江水流，玉人何處捲簾鉤。垂楊學盡春來瘦



不省人間有別愁

潞縣舟中寄京師楊上舍諸公六首

買得吳船繫柳根  
潞河新雨過黃昏  
都門只隔烟中樹  
一夜尋君苦夢魂

故人萬里俱為客  
十度春愁九別離  
京國向來猶未覺  
天涯明日倍相思

午門烟水浴輕鳬  
曾共花間問酒罏  
楊柳青青舊時路  
別來還解憶人無

二月和風滿上林憶君時復走相尋夜來見月堪腸斷  
城鎖千門碧樹陰

生來不識酒中味憶昨故人常見招不是多情能度曲  
樽前恨殺董嬌嬈

春風亭館看花時自變新聲教柳枝只恨秀娘空第一  
不曾歌得斷腸詞

戲簡張伯貞三首

第二橋東楊柳新舞腰爭學楚宮春可憐張緒才情少

孤負長條不贈人

張生肆意輕流俗一室蕭然獨嘯歌幾度見人狂欲死  
醒時常少醉時多

日暮醺醺出酒家更過鄰肆喚琵琶玉奴已伴他人宿  
獨自歸來卧落花

墨梅

天涯不見遙相憶窗外重逢乍欲迷彷彿空山明月夜  
一枝初出古牆西

寄王敏文四首

時將娶

憐君卧病更傷離  
語盡燈前把臂時  
恨殺城南醉張紀  
送行不寄一篇詩

月館花開厭獨居  
故人別後意何如  
衡陽直過瀟湘去  
南鴈時來好寄書

青樓只在石橋東  
幾度聞君醉落紅  
近日綠陰濃似雨  
門前別繫玉花驄

碧雲冉冉汎清觴  
明月娟娟照曲房  
想爾此時逢謝女

愛渠中夜喚王郎

楊村

楊村岸頭驛使回  
直沽洋裏海船來  
軍夫伐鼓欺行旅  
百里維舟不敢開

臨清

五月河橋繫客舟  
舊來河水至今流  
落花冉冉無消息  
垂柳深深盡別愁

馬都水墓

舊鑿河流遶墓長親

一作新

栽堤樹與祠荒行舟借問頻

回首過客傳聞總斷腸

孟陽津

孟陽津頭烟柳多雞鳴臺下客帆過誰家學舞翻紅袖  
盡日含嚬惜翠蛾

櫂歌八首

河中日日水悠悠誰道人心似水流河水灣迴有時直  
人心屈曲幾時休

朝朝風雨送船行  
白日無晴夜有晴  
東岸熱燈西岸見  
中間猶自不分明

河上風吹楊柳枝  
河邊日落閉門時  
前船好待後船至  
南人莫被北人欺

行船日日恨船遲  
船頭水聲無斷時  
昨夜天晴好新月  
誰家學得畫蛾眉

攀柳莫攀當路柳  
繫船須繫上風船  
當路人行無好樹  
上風浪小得安眠

去年船裏逢端午今年船裏又端陽九節菖蒲本仙藥  
如何曲曲似愁腸

生兒寧作漁家子生女莫嫁征夫兒征夫年年好遠別  
漁家朝暮不相離

寧向泥中棄蓮子莫向水上種桃花蓮子出泥終見藕  
桃花隨水不還家

寄李尚賓三首

久別思君欲白頭書來真足慰離愁衡陽五月無回鴈



江上常時獨倚樓

聞道齋居盡日幽可憐  
文采獨風流祇應湖上求如願  
何用人間問莫愁

隱隱青山湖水頭  
登山臨水惜同遊  
舟中只擬從元禮  
月下空令憶子猷

和黎別駕四首

漢陽城東湖水碧  
大別山上高雲涼  
猶苦登臨近官舍  
更將雞犬入山莊

山中野屋連修竹門外溪流半落花偶入青峯得樵徑  
去尋白鹿到仙家

手種松株逾十尋家藏書卷值千金溪雲已任行時滿  
山雪兼從坐處深

涼風滿地吹香稻明月當庭照短籬一夜空階聞落葉  
平明和露取題詩

魏元君壇戲和陳彥高三首

池上仙房閤古臺世人傳是鍊丹來自從雲蓋空中滅

徒見風簾月下開

衡岳仙成只可聞  
南昌何處覓夫君  
隣兒狡似東方朔  
偷得金桃不見分

道士焚香禮紫虛  
故人題字滿齋居  
可憐宋玉工詞賦  
不及文簫有韻書

赤壁圖

憶過臨臯訪大蘇  
古祠寥落水禽呼  
如何月夜黃州夢  
却在西風赤壁圖

過豐城二首

石泉灩灩照晴暉  
山崦茸茸帶夕霏  
憶得往時松下路  
兒童相逐採樵歸

隔溪篁竹似吾廬  
竹裏人家夜讀書  
一去故園如昨日  
春來頻夢帶經鋤

題宋道震栖霞山四景四首

谷口林廬映水涯  
樹陰鳬鴈一作鴨近  
人家春風恰似河

陽縣開遍山中處處花

水檻涵虛直翠微  
風林當晝却炎暉  
青青石上長松樹  
獨稱山人白氎衣

木落江南鴈過時  
獨行幽思少

一作野

人知多情宋玉風

流在馬上猶能寄楚詞

雪裏無人共酒盃  
行吟處處只逢梅  
月明白向前溪問  
恐有扁舟到却迴

題墨蒲桃六首

漢使歸朝歲月深  
離宮別館翠陰陰  
不因宛馬來中國

那得龍鬚徧上林

西域蒲桃滿玉壺  
貢時常續紫駝酥  
向來天上沾餘瀝  
今日湖南看畫圖

夜靜山庭映葉虛  
秋來風架落藤疎  
月明滿地無人到  
時有幽人學草書

暑雨過庭龍怪生  
南風吹架綠陰清  
如今零落成秋實  
猶作蕭疎弄月明

聞昔降龍過五湖  
時因持鉢見龍鬚  
近來窓下拋藤杖

忽悟衣中得寶珠

為僧題  
松卷畫

架上龍鬚十丈陰  
異方風土種來深  
猶憐漢使通西域  
未遣宛王見上林

蔡氏隱居

仙隱深深聞遠雞  
青山別在郡城西  
亦知好竹能開徑  
只擬尋花共入溪

題畫

迢遞雲山隔遠溪  
微茫烟水帶長堤  
秋來木葉多搖落

日暮寒鴉不肯栖

遊園和吳光輔

雪外高亭倚竹根  
石門幽徑躡苔痕  
重來花發應千樹  
只恐漁舟失洞門

送桃與孔學在李尚文

千歲仙桃不可期  
摘來翻恨寄君遲  
武陵太守如相問  
莫道秦人始種時

題張天彝山水卷



江上晴雲起亂山  
行人長慕釣舟閒  
雙鴻更背湘潭去  
南盡衡陽幾日還

送楊彥才歸南陽

南北雲山萬里餘  
洞庭秋思近何如  
故園獨傍隆中去  
落木蕭蕭見草廬

雙燕圖贈王惟中

玄鳥飛時綠樹春  
湖南烟際往來頻  
明年社日君何處  
逢著新巢憶故人

送姚景翔歸武陵

沙上清尊照舞裙  
暫時相值即相分  
明年花發秦人洞  
遇著漁舟定問君

方少府席上四首

故人之居湖水傍  
別有幽墅炎天涼  
聽詩自喜當明月  
把酒先拚盡夕陽

有酒其如醒者何  
題詩予愧古人多  
已辭醉後能騎馬  
敢比書成欲換鵞

翠袖臨觴拂素筵一嘆一笑使人憐多情竹影留歸騎  
何處菱歌起別船

歸舟欲行且復住故人有客解相存也知為米求彭澤  
不是攜家隱鹿門

別劉煥宗

瀟湘江上舊逢君無數青峰映白雲明日扁舟却相別  
洞庭烟樹綠紛紛

題飲馬圖

一斛寒泉照紫騮蕭蕭駿尾動高秋夜來檉上西風滿  
憶傍寒雲飲隴頭

題蘭亭圖

勝日山陰共賦詩風流猶想醉書時如今池上無餘墨  
長使人間學斷碑

題輞川圖

摩詰歸來愛輞川清辭妙墨使人傳江山故業渾千變  
文物餘風見百年

簡孔伯明知事

昔別長沙失送君  
岳陽音問日相聞  
幙中尺牘應稀少  
時出藏書校古文

捕魚圖

落木蕭條沙渚空  
截江漁網暮含風  
天寒紫蟹應無數  
便擬持螯坐短蓬

題潘文學扇

聞說幽亭近水開  
微風時自竹間來  
惟應為客通三徑

盡日清談不遣回

簡鄧仁康

洞庭之南地卑暑況復長夏少相親  
歸舟夜發青楓底忽到巴陵逢故人

簡善道原

湖南五月洞庭秋楊柳深深繫客舟  
遙憶郡齋無一事題詩頻到岳陽樓

簡楊好問

湖亭初得寄來詩幾度長吟恨別離近日扁舟洞庭野  
雨中多是憶君時

題畫松四首

石角槎牙折斷崖雨聲蕭颯動高齋忽疑落日翻林影  
半樹參差照水涯

石上枯株老伏苓尚餘孤幹倚青冥若為借向天河裏  
夜夜浮槎載客星

太山祠下古時松雷雨蒼茫已化龍忽向人間見奇畫

老枝猶恐襲秦封

遙憶商顏松色青  
女蘿枝上醉眠醒  
自從四皓安劉後  
歲暮何人采茯苓

題松菴上人墨葡萄七首

磊磊玄珠得露垂  
蜿蜒翠蔓與風宜  
向西萬本無人見  
時有山僧學一枝

奉使初從塞外過  
車前烟蔓翠婆娑  
江南妙墨今無數  
未及張騫見得多



初月生林白露垂近簷秋色正離離西風一夜明珠滿  
却是驪龍睡著時

漢苑尋常露下時月明高架影參差上林近日無來使  
腸斷江南見一枝

露顆含香近客衣蜜蜂蝴蝶繞藤飛夜來應值驪龍睡  
探得明珠月下歸

葡萄十丈翠蜿蜒葉底驪珠萬箇懸昨日大風翻架倒

一枝吹墮衲僧前

為僧題

南岳山僧工學幻空庭長愛翠婆娑若教親見苑西種  
醉墨淋漓意更多

和宓子與送圭峯僧二首

飛錫翩翩去玉京也知富貴視來輕清江樹底天寧寺  
講罷長廊看月生

官道垂楊接帝京飛花渾傍驛帆輕揚州南去春多雨  
一夜船頭報水生

題山家小景八首

萬壑蒼蒼雲氣昏石泉斜落古松根  
前林欲暝僧歸晚應聽鐘聲到寺門

浴鳬飛鷺聚寒塘落鴈歸鴉映夕陽  
忽憶湖南烟樹裏倚闌秋思正茫茫

松下孤亭映古茨幅巾來往靜相宜  
門前一水應如鏡照見龍髯落半陂

窈窕松杉入白雲千峯何處覓夫君  
中洲雨過多芳草誰見哦詩坐夕曛

門外千峯含綠姿  
居人衣服似秦時  
仙源直在桃花裏  
世上漁郎未得知

清溪白石無人到  
古木蒼藤徧水涯  
日出羣鴉渾去盡  
山雞照影獨多時

鴈起秋空樹色遙  
行人江上駐歸橈  
海門東去應千里  
白日微茫見落潮

花底溪流暖映空  
石邊林氣翠含風  
輕舟似識秦人洞  
直上尋源或可通

酬楊謙三首

江路垂楊亂客愁藕花時節憶同舟  
鴛鴦鸕鶿頻相近  
空使愁人欲白頭

玉樹秋清白露垂東遊取醉莫多時  
金陵小妓能相惱  
應解明璫乞贈詩

吳女嬌歌倚畫船柳搖輕翠映嬋娟  
風流妬殺金陵子  
費盡黃金學步蓮

題蒙孤峯小像

紫髯蕭森朔漠氣白氍飄颻巖石間絕似仙翁遺世慮  
千峯松下採芝還

題廖衡瞻墨梅

別來江樹雪參差月夕尋常夢見之昨日雙溪重照影  
春風猶識歲寒姿

送孔庭會之桑江巡檢并簡鄧和仲虞伯雷二  
憲掾二首

一騎弓刀入桂林桑江孤障暮烟深西南地重多烽燧

近喜羣偷已就擒

憲府諸郎總好文  
將詩煩為道殷勤  
應憐小弟官同冷  
日日登高望白雲

題蕭敬仲墨龍

閭闔迢迢白氣通  
九江雲起墨潭風  
夜來仙杖無尋處  
應向人間作歲豐

送蘭隱上人遊方

清江江頭芳草春  
林深盡日不逢人  
明朝散入千山去

葉葉清香是法身

題畫羅漢二首

流水濺濺出石間  
應真遊處碧波閒  
惟應此去天台近  
杖錫時時共往還

聽法歸來憶梵天  
臨流坐石意蕭然  
如何不作飛空去  
却愛山中弄石泉

寄趙德隆檢校二首

紅葉千林對夕曛  
黃花三逕踏秋雲  
鴈來莫厭書頻寄



江上長吟正憶君

鍾陵城郭俯江波  
畫省沉沉散玉珂  
檢校幕中清似水  
新詩應比別時多

臺憲今時倚舊臣  
嚴君風采照湘濱  
行騎驄馬逢南使  
肯寄雙魚問遠人

題歲寒圖

梅花亂開修竹裏  
孤月正挂蒼松尾  
空山歲晏憶同心  
誰見幽人夜深起

半身松圖

老樹龍鱗雜古苔  
晴窓雲氣撲衣來  
惟應咫尺論千丈  
莫以尋常擬大材

瓜圖

烟蔓蕭條帶守宮  
露團甘美熟秋風  
可憐舊日青門客  
說著東陵似夢中

木芙蓉

別院秋風起翠帷  
美人樹底獨含悲  
能言宋玉多情思

腸斷東牆乍見時

金沙

青鳥遙從漢殿迴  
春風吹散九霞盃  
羣仙半醉歸時晚  
絳節翩翩獨後來



傅與礪詩集卷八